

【竹雞仔】 羅紫云

臺灣个鳥仔有當多種，大部分都會飛，其中有一種無幾大隻，頭那細細仔紅霞紅霞當像雞仔个頭那，背囊、翼胛个條紋豬肝色，肚底像魚鱗白罕白罕，兩側賺係一種淺咖啡色條紋，著个衫老實、排場盡古典，講該係保護色一點乜毋會差，當古董佢毋會飛、淨會走、會唱歌仔，故所無摻佢安到「竹鳥仔」，嗶摻佢安到「竹雞仔」係毋係盡有意思呢？

客家童謠大師馮輝先生，有一首童謠恁樣寫：「咕咯乖¹，咕咯乖，無米正來揸。」聽起來當有人情味！這鳥仔當團結、感情當好、有家族觀念，見出門就歸家人非常細義行共下，還行共條路線，路行到光滑光滑，知總个人儘採就捉得著幾下隻。毋過佢當畏羞、無膽，聽著一息息仔人聲，就會驚到尾瀉屎，當遽就瀉走，鑽落草蓬肚咧！連魂影就無看著。

「竹雞仔」天生好聲脰，兩片山隔一條河壩，這山唱該山和，這片喊該片應，嘴碼好又滑溜，完全毋使麥克風，連連續續盡命牯叫，聲脰乜毋會爛

忒，就像客家人个山歌對唱，還妙哪！

盡可惜佢毋會飛，毋會做靚靚个竇，就隨便樹頭下个樹葉堆就生卵孵子，

總係愛等有良心个蛇哥、老鼠食伸个，正係厥个子孫，看破哩正喊「知到底」、「知到底」，互相勉勵。「竹雞仔」係唯一會唱山歌也會講客家話个鳥仔，敢係摻客家人戴相近、山歌聽多个關係？

偌這下戴个位所係社區，社區就係歸排販仔屋，麼个人都有，當然會有原住民，佢兜會捉「竹雞仔」轉來畜，一天光抑係臨暗仔，無就落水過後，不時聽著佢當鬧熱个叫聲，大嫲牯聲放勢喊——「知到底」、「知到底」，緊喊緊遽，又鬧棚又合線，喊到最尾還會講「四隻一盤」、「四隻一盤」，摻人講佢恁細隻，愛有四隻正做得炒一盤，實在還有趣味，毋過聽起來當衰過、悲傷、淒慘，因為佢永久乜尋毋著厥屋下人咧。

「竹雞仔」係一路中藥材，做得補中益氣，愛放薑嫲絲，毋過偌認為毋好食佢有較好。歇都市个人係愛拜訪「竹雞仔」，到臨暗仔時節做得去山邊，偷偷仔拜訪就好，千萬莫驚動著得人惜个「竹雞仔」。

1. 咕咯乖：音 gid\ gov\ guai✓；竹雞的叫聲。